

欽
定
全
唐
文

欽定全唐文卷七百八十三目錄

穆員一

爲汝州刺史謝上表

同德寺湊禪師院羣公會集序

奉送前合州徐使君赴上都詩序

緱山道中五詠詩序

蝗旱詩序

送興平鄭少府歸上都觀省序

新修漕河石斗門記

繡西方大慈大悲阿彌陀佛記

畫千手千眼大悲菩薩記

尊勝幢記

東都龍興寺鎮國般舟道場均上人功德記

新安谷記

新修漕河石斗門亭記

繡地藏菩薩讚

并序

畫釋迦牟尼佛讚

并序

繡藥師佛觀世音菩薩讚

并序

繡西方阿彌陀佛讚

并序

繡救苦觀世音菩薩讚

并序

繡藥師琉璃光佛讚

并序

畫元始天尊釋迦牟尼佛讚

并序

鮑防碑

欽定全唐文卷七百八十三

穆員一

員字與直祕書監寧子杜亞留守東都署佐其府授侍御史

爲汝州刺史謝上表

臣某言伏奉正月九日勅授臣使持節汝州諸軍事守汝州刺史充本州防禦使臣祗荷寵命兢遑戒路以今月二十五日到州上訖臣聞位非所據榮實爲憂任過於量勤不補敗伏自省懼心魂震驚臣某誠惶誠恐頓首頓首臣

項佐方鎮本逃饑寒推遷歲時累忝班序而身遠跡賤才
薄官微宣力中朝事將望絕昨者一介陪隸萬國朝元不
寤日月垂明幽隱斯燭荒徼未効記意於勞問之初愚懇
微誠畢辭於朝賀之次亦能信宿遽承寵光況地屬王畿
任當時要憂寄所切文武是資何堪負乘又過獎擢唯當
以竭誠自勵戒懼自持庶副所受安人理戎之命少酬萬
一無任懇悃屏營之至謹遣某官奉表陳謝以聞

同德寺湊禪師院羣公會集序

歲五日杜揚州出鎮東洛羣公禮賓用餞會於此堂以候

於戲從公率俗道機交態倦怠得於此樂道得於此眾君子同之員亦同之況乃竹深寒庭雪淨禪室境捐世染坐對天涯甘茗代醪清論如藥蓋勞生之少息羣心之一勝會耳惜乎夕鳥集暝客散候人至車馬行各從爾司復返吾患嚮來所聚倏爾成空索過風於前林求往夢於旣寤不可及也尚書郎李君曰其可及者詩猶庶乎詩之哉

奉送前合州徐使君赴上都詩序

二月中節時芳爲人柳先攀折而垂水待臨泛而滿花迎酒客而笑鶯隨詩人而吟有良二千石徐公解印南國將

赴鎬京與東風遲日偕至洛中賢士大夫以公著名茂實
詩言酒態相從於賞春之場其潤色也與鶯花並東溪南
陌詩鋒函合迭爲晉楚者日有聞焉惜乎偕賦不疲羣芳
未老而不謀者別中道間之嚮之待人攀折臨泛與笑而
吟者又似有意乎傷且怨矣矧同游者之心乎僕也貧不
知春病不逮會諸公以異日徵文之籍不獲辭焉所以敘
作者之意共歎春未去而公去故其思也同

緱山道中五詠詩序

仲春之節洛帥還近郊亞尹尚書郎御史元公李公韋公

將事如軍賞心百里子時有所繫不克與偕三君子賦嵩
峯漢陵維源竹澗仙壇五篇遺我居者善乎詩之時用也
如繪出其芳鏡涵羣象暈呈鮮彩琴韻雅音俛仰吟詠之
間若在春原之上晴峯之下境移衆目勝集我心詩之時
用也如此否則一時得之人與閔雲並散興與夕陽俱盡
春與殘花共謝游者居者等無及焉他日屬和之聲洛陽
爲之動旣編次盈什則不可不紀其所以然

蝗旱詩序

甲子歲秋大旱螽蝗生其爲異也聽如疾風視如飛雨仰

如陰雲俯如流水乃至天降其高地增其厚明爲之昏其
災也如農夫薙草繁霜凋木烈火燎原嗚呼甚矣矧夫旣
枯之稼僅遺之粒其可望也余時從師於東周居鎮之府
僚友霍總賦蝗旱詩一章七十有二句其指兵生蝗蝗生
和和生瑞猶夫空谷之響立表之影以其類至必然若乃
春秋書災紀異之法詩人風化美刺之義備閱章句則知
其文余味之深敘以爲引

送興平鄭少府歸上都覲省序

凡我東周之遊誰非君子之門吏子之至也惠羣公之思

且惜其去之速子有別墅我爲甘棠富清溪翠竹豐流鶯
密樹比而遐幽而曠美而不華野而不陋用厥羣勝甲於
東溪四月之節其芳始茂葉成清陰花結朱實中林惟籜
碧玉呈鮮麥風之秋與輕暑偕至二三子春醪夏服於是
乎宜之陟則在處降則在舟湍冷竹韻合如簫管時有山
鳥雜乎其間羣籟同音俱以留客而嚴城暮日與林泉意
殊奪我當歡趣子命駕諸公以爲他日過庭之間次詩禮
者其惟吾黨與東溪乎屬事徵詞實假會文之友况吾子
以言以立可久可大作者之意不惟系召南之什宜用緇

衣之美副焉

新修漕河石斗門記

分洛爲漕斗門在都城東南中橋之右舊制喉不深口不束其流隨之水斯溢旱斯涸東有斜堰俾其來往終歲不修輒壞修則水積高而迤南北北傷則洛亘邛趾南傷則魚遊井鄺不修則漕復於陸且其地與岸皆寘薪焉不冉閏不一易每歲繕塞斜堰洎南北隄橋之費相與盈萬其斗門之功不計蓋其弊者也安平公治三川之暇顧念於此之疾未去且曰水之性導無不順壅無不害善爲水者

唯其所趣使若自然其要在於不與之競而已是用浚斗
門之下以量其入庠斜堰之上以歸其餘庶乎饒不爲增
傷不爲減盈萬之費歲收於公而通海之波率土之運東
西交驚合朝宗之義焉中橋之旁有古堰廢石沈於泥沙
公乃發而轉之以代寘薪之制省於自他山而致者蓋百
之一猶懼剛之不勝柔岸化於水乃授規矩俾之追琢如
斧斯銳以分其衝如月斯仰以折其勢積石山關中流湯
湯南鄰鑿龍永代無愧上濟行邁是爲通橋歲三月興作
四月畢事人不見始而覩其終埒其功用不足於常歲之

金匱要略卷之三
數而不朽之利與皇都洛水垂之無窮焉嗚呼物之至柔
者水不得其理甚者懷山襄陵其次決隄防隤城邑夫惟
不爭之力然後勝之天下之理一理也制天下之至強者
其唯不爭乎於水也見公之政於政也見公之德異日觀
易簡久大之業此非其一隅哉公以爲成公之志者實肆
其勤命以名氏刻於岸石仍俾末吏謹而書之貞元四年
四月丁亥日記

繡西方大慈大悲阿彌陀佛記

儒之執喪也極其哀止於毀其於既往也則無及焉西方

聖人以大慈大悲爲功追護往生爲誓凡爾銜卹靡至克窮罔極如有求而不獲者何末由斯而洩之貞元八年百一旬有六日我伯姊前烏程令宏農楊萃故夫人之喪再周先是哀子泰衡蒿復觀泊女子相與號曰我之生也自親之生今我報親幾何而旣何先王制禮不即人心何義和迅節不恤余慕於是合哀僞聖誠而禱之男冥其心女集其指迨茲日而阿彌陀佛現嗚呼西方之教念焉斯至矧是像也一縷一哀一哀一聖凡億萬縷爲億萬聖億萬大慈大悲一之乎爾願其爲追護也可訾量哉泰等毀傷

金匱要略卷之二十一
見者之神號墮鄰人之淚是月之暮有逾其初舅氏員撫而廣之曰親之於子也生三年而免於懷子之於親也喪三年而免於服是則服之終也豈哀之終乎記所謂君子有終身之憂蓋哀之終也此又哀之終也豈孝之終乎經曰立身揚名以顯於後世夙興夜寐無忝爾所生此孝之終也若然者爾之孝爾之哀偕爾身齊爾性於是始孝何痛夫終焉員悲不能文強爲之記

畫千手千眼大悲菩薩記

貞元七年孟夏月再旬有六日我伯姊宏農楊氏夫人之

喪期女祕書省正字河東裴求已妻痛夫四序往而還萬
化周而始慈顏復覩終天無期伏念身體髮膚重於所受
不敢以毀生爲報其發於一號者則昊穹可聞泉壤可徹
恭西方之教有追護之功崇建是像庶乎有及吾聞之古
之泣血不必以血爲淚痛之至者如泣血焉是像也起爾
一心成千手千眼自素爲續自續爲相自相爲聖自聖爲
福所以復於爾所生者庸非爾之血乎希微宵冥之間惟
至可至之至者孰至於哀哀爾思舅氏員自以一虧而不
可復續者骨肉之謂泣撫其事從而記之

尊勝幢記

我生同氣者七人先五後二兄姊弟妹半之不弔天降割
于我今年春夏次妹安國寺大德尼伯姊前烏程令宏農
楊夫人逾月繼酷先是兩兄郴州刺史贊前右補闕貶連
州司馬質從官於遠員洎弟妹前監察御史河東裴某妻
痛支體一斷終天不續乃相與鬻衣庀直揭茲靈幢願得
輕風微塵泊日月度影之所及也深茲至念慘與之俱然
則巍巍永永斯乎風土日月相無極焉是幢也實表安國
之塔伯姊之隧貞元六年秋七月七日前侍御史穆員記

東都龍興寺鎮國般若道場均上人功德記

按經文我以神力供養不如以身供養故曰若能燃手指
乃至足指者是名第一之施蓋菩薩之行也今我上人以
兩臂爲爐爇香千度用夫苾芻蕭之義以簡萬望夫以百
福莊嚴之重千度焚燒之苦與夫一指之功不爲多乎又
刺體之血以嚴經像若素爲塗若繪爲綵若寫爲墨凡成
就阿彌陀佛一軀觀音勢至二善二菩薩各二事經千卷
經以皮爲紙以血爲墨書寫經戒亦菩薩之行也曷若加
之圖像三十二相八十種好盡取諸身乎上人姓王氏東

周河南人七歲喪所恃十一喪所怙童蒙孤子無兄弟之
親自毀其生用集封樹已而嘆立身揚名無逮既往乃發
大宏誓以報罔極大厯五年始居龍興寺鎮國般舟道場
爾來足不踰閭者垂三十載其爲業也形不住心夜不息
晝外不舍百刻之一中不遷萬化之二勞其形與天健精
其志與日新蹈極樂於自竭之操前後以一月有一旬旬
有九日爲一息者不記百數其願以本尊本以願爲願其
病以眾生之病爲我病我生未已我病曷祛我病未祛我
願曷已然則大慈大悲之誓竟我願云竟無邊生生之苦

盡我病云盡我生有滅我願與生生俱生我形或勞我心
與極樂無極巍巍乎可思量哉員太夫人河東郡太夫人
性合真如業通禪寂嘗謂學者千萬達者二三苟未至於
心離有無跡超生滅則苦行爲難爲至誠格諸天念嚮羣
望亦足使見聞聳善遠邇歸心況乎啗啗迴向之徒聞道
甚稀睹相且衆則上人所以持本教濟衆生與夫禪門諸
祖迭爲舟梁可無愧矣又懼夫物之尤者見異於類行之
殊者或疑於常申命小子以紀精苦之能所以題之於此
貞元十年五月二十五日前侍御史河南穆員記

新安谷記

京洛佳賞盡走乎闕塞次則東城以桃李繁華相高北山
漣陽有崖谷豁洞之勝蓋天然疏鑿以遺來者而人不之
爭我公懸車之三年探得其最凡遠於國門邇於闕塞者
四之一買之直減於東城之貴者亦如之連岡疊磴中斷
夾關爲其拱峙如狀如意翠竹茂樹縈環森羅爲其緣飾
如續如織泉出山腹釀而爲池醲而爲派帶於竹樹葱籠
之間池可行舟派能流響果園蔬圃用以爲溉其餘與漣
水合於山下臨玩之美耳潺潺目磷磷不俟漱浥而煩襟

如洗於是卜瀍之上泉之側周竒顧盼擁抱之勢作爲新
亭春之日百花流鶯笑語滿谷迭相爲主待人爲賓始至
也若讌賞之之疎將去也若怨棄之之速夏之日清風入
林徘徊不散若爲繁暑與之竟夕而流泉娛客亦奏雅音
秋之日霜淒氣肅萬象畢清亭中一望超忽天外而片雲
行鴈又似與賞心遠目相期於前冬之日木落天迴遙山
入戶可愛之景照於陽坡遲遲爲人人散而斂凡四時暇
日公與大夫從甥姪子孫攜琴樽翰墨游於斯燕於斯慈
顏怡天和熙一觴舉萬福隨穆穆雍雍翼翼夔夔中外具

慶如塤如篲公曰人生知足爲富當時爲貴奚俟外獎則此地足以忘年何必陸賈擊鮮疎廣散金然後爲適與王氏之少長咸集潘家之兒童稚齒吾之適也爾羣子識之謹按春秋之義地從主人今我公開國新安則家谷宜以新安爲稱新安之爲解也旣所以旌新之安亦所以祝吾家之慶與茲山之賞日月新而永永安安之謂也又江南有新安者山水之異絕於中國維其似之是以命之第三子員受命紀石且若從者名位列之於陰也

新修漕河石斗門亭記

斗門卒事之月安平公罷尹杜公實來明日公會杜公觀厥成績即得洗心遠目之所盡一覽四時之美乃授中制勅爲此亭有若嵩高二室萬安闕塞實簷前之山清洛麗都類夫河漢實砌下之池春流夏雲露風霜月殊狀異態同歸於勝實座中之器修橋曳虹左右扶翼層樓飛鳳前後擁抱實四楹之飾而顯氣清風徘徊旦暮若有所爲凝爲清陰不唯待羊公之登眺李膺之臨汎使忘機倦俗之客得人人而私之或曰二公之來也境與耳目共清其心心爲事源政得於靜有以助清靜之理可無述乎刊諸珉

石之陰是爲亭記

繡地藏菩薩讚

并序

今年天之不佑我也甚矣春三月謫我以次妹安國寺律師之喪夏四月繼以伯姊楊氏夫人之酷季妹前監察御史裴氏妻泣曰人皆有姊妹而我獨亡所以發於骨髓者深宜格於神明之聽先是太夫人嘗爲安國繡地藏菩薩逮卒哭而就是夜季妹夢伯姊謂之曰嘗知是像追護於我是用鬻衣充直緘淚僞工亦逮卒哭而就嗚呼萬聖一致乎慈悲莫大於救苦苦有生死之異聖者亦隨之而殊

如周之六官分天地四時之職蓋同歸於理而各有典司
若乃拔三塗證六道紓有生追往之慟則菩薩超羣聖焉
時貞元六年孟秋初七日也將以謹功之始旣月而日之
且系之以讚曰

維我素履景福崇嗟爾至聖元感通有赫大士願力同五
綵萬縷相好備一心十指聖靈萃振幽冥今如髣髴

畫釋迦牟尼佛讚

并序

貞元八年九月二十八日員傷神之慟至是而期外姑故
河南令裴君夫人鄭氏雅有天性之愛加人一等而疾視

之勤喪感之甚則又加焉至哉母之於子也想其方娠想其既育想其乳抱想其稚戲想其習教想其有行生十九年而夭歲一周矣無一日不同其十九年之愛見其遺跡見其同類見其所從見其所嗜則哀與之新訴於神明而不聞禱之寤寐而莫睹索於太虛而無像追之往事而日遠乃求大聖之旨裂素點絢丹青睟容願以己之深慈託於佛之巨力且曰吾子之生也以至仁爲性積善爲行二者之報同期於福今也夭而不深慈託福施不在於生不在於後宜在於既往矧聖者以巍巍赫赫從而振之然則

是像也金蓮之品安知非爾往生乎讚曰

生如花兮天如花先笑後號鍾我家喪有殺兮悼無涯哀
慈母兮晝夜哭歲一期兮聲相續懇元聖兮降冥福

繡藥師佛觀世音菩薩讚

并序

萬聖本願同歸乎慈一致乎至有若東方藥師琉璃光佛
洎大悲觀世音菩薩其威神德力最著於羣生倬然於人
間者也我季妹是用圖厥眸容永以成功其發念也淡逐
聲盡福隨響至其成功也靈以指集慶將縷延如其經文
則曰火不焚水不溺鬼不災祇不厲矧乃無妄之疾有生

之害何從而來哉且聖功元化陰陽潛護宜於自然動亨
元吉彼解焚拯溺攘災拔厲之功又安得而施之讚曰
伊聖力溥如天吾何願壽百年

繡西方阿彌陀佛讚

并序

唐故監察御史河東裴府君捐館舍二十五月而祥貞元
乙亥歲仲秋再旬有七日其嬭員季妹也號曰吾觀天道
日昃月虧幾何而追吾觀四時寒來暑往往來如奔吾觀
萬物秋落春榮榮落相續吾觀人事禍福倚伏則維其常
何天道人事四時萬物同歸於復其運如環而逝者棄於

川流日遠未亡之酷終於此生恭聞西方之教有三塗報
應之事大聖拯護之功是用發念髮髯有無之間躬現是
像嗚呼若聖功則亦無幽冥之苦蓋魂氣無不之也其返
於太初乎苟有三塗則聖者之力唯誠是據宜乎罪消一
念福積萬指可思量耶讚曰

嚴哉有赫自爾誠辟容巨力於是并能使往生彼國餘
及未亡無終極

繡救苦觀世音菩薩讚

并序

惟元精之和惟元聖之功惟善之報惟人之心順之則冥

感之所契蓋善積而福會心至而靈應類夫有開必先之
義存乎恍惚杳冥之間天不言神無像發於寤寐者其昭
昭歟我裴氏弱妹疇昔之夜夢老僧意夫聖者祈太夫人
之福懇懇焉聖者復之曰當繡若繪救苦觀世音菩薩且
視其形則如是覺而念之誠矣未果越旬朔嗣夢如初是
用心冥聖功指集晬容圓光具發朝日矐矐歲八旬有六
日我慈親生之辰也願於是畢工於是終聖於是興福於
是始同氣不類神明我遺禎夢靡臻斯文敢闕讚曰

猗經文兮頌聖德非知知今焉識識我夢願兮永符巨力

如四維虛空今夫何有極

繡藥師琉璃光佛讚

并序

東方藥師琉璃光佛事具本經今我季妹裴氏嚴是像也誠而禱之其嚴之何裂素點絢攢針緝縷以五采章成三十二相八十種好意夫十二上願從之其祝之何況我太太人福如上願而壽如縷數夫以大聖之力加於積善而赴於精誠宜乎其至也如歸其答也如響其久大無極而不可思量也如東方虛空抑經之有倡所以啟迪誓願發揚聖德者也苟以至誠爲用員敢讓於文乎讚曰

上天報應爲福爲極有赫大聖與天同力而我景行與聖
同德存存如山念念如川大聖拯護同符自然十二願我
之事億萬縷我之年

畫元始天尊釋迦牟尼佛讚

并序

聖人之教有三儒之先師曰孝者德之本教之所由生又
曰立身揚名以顯父母孝之終也若乃崇樹景福追護旣
往有無上無邊之力非智智識識之功則道釋二宗其用
一致記曰君子有終身之憂忌日之謂也歲孟秋晦我王
母太原郡夫人棄養之辰我公霜露永懷發是上願謂夙

夜種德以無忝爲念裕蠱垂範立家開國不足以爲顯鼎
鼐之豐蘋蘩之潔不足以爲饗蓼莪罔極石窮啟封不足
以爲報且曰元始天尊大道之原也釋迦牟尼佛萬聖之
祖也以五綵繪圖二晬容及此辰而就眷命小子贊揚聖
功其詞曰

嚴哉煥乎觀者迴向有類夫朝日初昇圓月始望又若二
聖現於空中髣髴乎不知其像我公孝思福應如響於戲
聖力巍巍蕩蕩

鮑防碑

有唐尚書東海宣公姓鮑春秋六十九公從三十六載致

政二

一作三

年歷官二十五凡居達官之長十二領四嶽十

三州牧之寄三貞元六年秋八月景申薨於洛陽私第冬

十月旬有七日從先公於北邙南原

一作郊

詔贈太子少保

給鹵簿鼓吹旌其卒塋後三年嗣子宗由惟中古封樹之

制且曰邱壠與年代相推幾何而平松柏霜露相薄幾何

而盡將令百代之後遊九原者徘徊不朽之烈歎息可作

之美其惟金石刻乎是用建碑墓以揚先懿公諱防字子

慎河南洛陽人其先蓋夏禹之苗裔春秋時杞公子有仕

齊者食采於鮑因以命氏曾祖標

一作謹

皇隴州汧陽令祖

仁爽雅州飛越尉贈眉州刺史父思溫彭州唐昌丞贈工

部尚書皆盛德下位發祥於公天寶中天下尚文其曰聞

人則重侔有德貴齒高位公賦感遇十七章以古之正

一作

名法刺譏時病麗而有則屬詩者宗而誦之舉進士高第

調太子正字中州兵興全德違難辭永王去來瑱爲李光

弼所致光弼上將薛兼訓授專征之命於越輟公介之始

兼訓之奉光弼也以順命爲忠不及於義公知光弼之不

終也諭而絕焉東越仍師旅饑饉之後三分其人兵盜半

之公之佐兼訓也令必公口事必公手兵兼於農盜復於人自中原多故賢士大夫以三江五湖爲家登會稽者如鱗介之集淵藪以公故也徵尚書郎優游公卿間執政者以代言之司見屬無何薛兼訓寢疾太原上以北門寄重軫念於薛思所以貳而代之者莫與公比召對勞賜寵而遣之公之至也人不知其帥之疾帥不自知其疾及其代也由亞尹中丞洎居守專征之倖各遷其任

一作各還其長

兵自

勇厲至於輯睦人自安業至於移風政自無闕至於有典代宗嘉歎之不足圖寫公形列於別殿蓋麟閣名臣之次

也三載朝覲屬今上嗣位惟新大政授公紀律俾作典刑
拜御史大夫旋以文武之柄方鎮爲大南國萬里俾之師
長統閩越轉江南公之撫人也以家勤之以子愛之利用
用之厚生生之詔加銀青光祿大夫右散騎常侍紀成績
也真拜右常侍扈從巡狩轉禮部侍郎上還鎬京展謝郊
廟公預太常折無文之禮進封東海公詔徵賢良求其讜
言時薦一作員仲兄不敢違詔承詔原注絕句實蒼生利之宰臣
病之與公並命考第者以爲異日故事言或有犯投之不
疑焉公曰使上聞所未聞聖朝之瑞也擢居甲第每歲貢

士充於王庭心爲靈龜事絕請托京師仍歲蝗旱務殷人
耗拜京兆尹詔下風行令宣政舉威革難理惠周無告旣
而痿痺生疾陳乞遂閒上置上將軍員以待功臣先用文
儒耆耄以寵其選拜右武衛上將軍厥疾加劇優詔授工
部尚書致仕徙家東周富天祿貴天

一作人

爵樂天命順天

和以終夫天年嗚呼賢哉公德本於孝才歸於用從王牧
人即戎臨事大畧以忠肅慈惠沈毅莊敏爲稱喜善怒惡
不必爲己論交任人必惟其終入爲羽儀出作藩翰夔夔
然以家人嚴君之義屬於長兄蓋什卿之祿千乘之賦一

以奉之四時賓客之事車服器用之費一以稟之公與夫人視諸孤羣從唯所授公不敢以禮秩異夫人不敢以居有私而敬公和樂之道於是乎久御史中丞武威賈全公之甥也少長於我登朝異門教切義方慈均天性故全之報也稱天下甥舅加禮焉一作加愛焉鄭滑節度使隴西李融公之吏也推以腹心齊厥憂寵厯佐三道其間如一故融之報也類天下賓主加歡焉於全也見公之內如融也見公之外然則公之行已與人可知矣夫人蘭陵郡夫人蕭氏始佐公賢終成公貴及公旣没清風如同二孤前左衛

兵曹參軍殿中省進馬宗參以文學世公之業孝友繼公之志猶曰不足以抒夫罔極於是發揚垂裕之義作爲銘曰

穆穆宣公爲王蓋臣終始明哲優游寵勛在昔理平逢時尚文高唱寡和長才不羣星河麗天卉木榮春羽翰方陸雲雷構屯乃佐戎師名屈道伸乃登天朝盛美惟新茫茫南國赫赫北門股肱王室父母生人執憲承式尹京作則春官主文宗一作常伯尚德出捍牧圉入趨宸極望實攸并謀猷允塞賢翼聖道厄於命方叔元一作員老冉耕所病

明明天子禮優致政曳履散金頤真係性良辰何遽厚夜
何長歸全故邱一作邱鞏洛之陽貞石是勒德音孔彰於戲
宣公百世不忘

欽定全唐文卷七百八十四目錄

穆員二

相國崔公墓誌銘

相國義陽郡王李公墓誌銘

福建觀察使鄭公墓誌銘

陝虢觀察使盧公墓誌銘

刑部郎中李府君墓誌銘

河南少尹裴公墓誌銘

監察御史裴府君墓誌銘

祕書監致仕穆元堂誌

京兆少尹李公墓誌銘

國子司業嚴公墓誌銘

驃騎大將軍劉公墓誌銘

欽定全唐文卷七百八十四

穆員二

相國崔公墓誌銘

皇唐相國博陵公姓崔氏諱渙字某佐元宗扶正厄運保
維宸極戴肅宗紹復大業底綏生人事代宗朝羽儀百辟
歷官二十三享年六十二以大歷三年冬十有二月二日
薨于道州刺史之寢明年歸祔于洛陽北邙山今上六年
追贈尚書左僕射夫人滎陽鄭氏華陰郡太夫人以子貴
也公三娶前夫人生冢子常山公公之清德重望洎天官

亞相之位事後夫人滎陽鄭氏恭公之理命以無違爲大
而龜俛拘忌出入銜恤推周公合祔之事凡龜從筮逆者
數嗚呼天不以西漢韋平之美惠于吾君使常山下世永
懷不集故有沒代之庸著遺令焉貞元元年秋九月季子
京兆府三原丞楊孫前渭南尉元方哀奉常山之志逮乎
在殯是月壬午啟博陵公之隧明月丁酉以華陰郡太夫
人洎繼夫人隴西李氏之喪歸禮也公大父諱元暉中書
令博陵王於皇唐有再造勲事具國史考璩禮部侍郎襲
博陵王與魏元忠趙貞固爲友出處齊名公則禮部之第

二子也天寶中厯屯田左司二員外郎出爲歙州刺史換
綿州錫金印紫綬大駕南巡以至誠大義感悟聖主中興
之業見於言下擢拜門下侍郎平章事靈武接位與上宰
房公琯奉冊書國璽唯新景命是時也中原有羿浞之亂
東南有吳淞之釁乃三分天下之一以八柄付公俾公仗
節督護河南山南江南淮南之地凡受賑專征者由公以
律二千石以降唯所遷置公於是度用均賦息人繕兵外
攘四封內敘多士望高寄重怙寵者排之降左常侍領杭
州刺史俄轉常州徵拜祕書監太子賓客大理卿坐失繫

因移信王府傳轉尚書左右丞吏部侍郎御史大夫大歷中元載顓政中外附之公對敷內庭數其不赦之罪上頷之未諭公抗詞焉寺人屬垣漏言于載未幾有道州之役逞憾故也公標鑒遐明姿度宏粹松茂玉潔風清雨潤文以經邦爲用學以爲己爲宗承祖禰以付子孫者清白孝友其哲人哉夫人磁州刺史會之孫潁州太守長裕之女年若干捐公之館子曰縱實常山公繼夫人舒州刺史紹之孫左羽林錄事參軍晃之女年若干遺公之祿子曰撻仕萬年尉不幸早夭二夫人地清天和夫賢子孝四者均

有之清之發祥和之應壽賢之用貴孝之報榮四者皆違之哀哉孝孫元方痛先人存歿不伸之志其號天也與吉凶俱咨于叔父揚曰先志未從不敢以見先祖是日也奉二夫人合於此室既定而常山拊焉員常山門吏見託銘石其詞曰

於穆元輔歸全故邱列樹已拱清風悠悠邈矣夫人同凋上春配忠生孝翊聖懷民賴及於國慶達其身五父雙啟九泉同閉遺厥嘉祥及爾昆裔

相國義陽郡王李公墓誌銘

皇唐九葉天啟元聖運并中否蓋有苗不恭舜德於是乎
盛獫狁孔熾周道於是乎興而我相國太保義陽王文武
命代經綸應期柱石將傾舟楫未濟腹心王略爪牙天罰
芟夷大憝覆冒生人公諱抱真字太真本姓安氏世爲涼
州盛族高祖修仁佐太宗征伐益大其家寵位本州啟封
申國會祖永達開府儀同三司左驍衛大將軍祖懷恪陳
州司馬贈兵部尚書考齊管贈太子太保或才光于時或
道屈于命從父兄司徒涼國公抱玉事肅宗代宗勲著王
室錫以天姓代宗之初僕固懷恩怙兵犯順公時再命汾

州別駕隨州陷焉懷恩雅奇公才而懼公之不同所以待公與衛公者偕切公竟以智勇自脫投身京師上方以懷恩爲憂不啻于祿山思明之難遣公進討公曰郭子儀領朔方之衆人多思之懷恩因人之心以邀其勢給其衆曰子儀爲魚朝恩所戮刼而用之今若復子儀之位可不戰而克上嘉而納之其後懷恩父子皆敗朔方有衆洎西北兩蕃望子儀而頓伏皆如公策拜殿中少監擢纓清列澤盛當時卿大夫賢者從之遊朝論美價於斯爲重大駕幸陝欲遂都洛陽公入陳婁敬子房之說且曰臣見犬戎今

已遁去翌日長安告至如公之言代宗器公之才將試其
用詔兼御史中丞充陳鄭澤潞節度留後公以所奉之主
則從父兄司徒公乃深惟大雅明哲之義罷請留府願効
列郡優詔從之拜澤州換覃懷二邦之人得公失公皆如
父母未幾復統留府之政累加御史中丞左散騎常侍并
領磁邢二州增秩加邑國之報也今上卽位用聰明神武
照臨不庭命方叔召虎鎮衛四國是用授以黃鉞俾以專
征而方命之徒畏威先舉田悅以暴兵五萬寇我東鄙刼
邢州圍臨洛守將乘城如山不拔忿志且恥旣悉索境內

且乞師于鄰掘地于雲壕壘數合上絕飛鳥下及黃泉公躬執鉦鼓屢挫其銳詔命太原節度使今侍中馬公與公合從且曰盡敵由是摧堅陣于雙岡釋重圍于二城殲逆徒於洹水凡三戰三北退伏于魏窘如囚拘逆將朱滔誘今司徒王公合范陽恒山之眾來爲悅援公與馬公泊羣帥屯于魏橋相持卒歲無何京師有朱泚之亂鑾輿外次羣帥失圖蒼黃還師惟恐在後公徐統士馬退次洺州旋奉詔書俾勤所職于時將卒倦戍久矣及其還也如川壅而潰勢不可遏公以至誠大義發爲號令俾四郊激勤王

之志三軍忘思歸之心進師漳河獨壓強寇先是與公戮
力太原朔方盟津洎神策四帥十萬之旅一朝雨散孤軍
特立天下危之公忠貫天地機先鬼神動如雷霆峙若山
岳銷難於未朕成功於無戰氛侵四廓豺狼坐馴上在奉
天躬禹湯勃興之德曰萬方有罪罪予一人發號改元與
人更始公奉揚天澤浹于四鄰增日月之明廣雷雨之施
由公而復爵位者今司徒王公洎魏博青齊三帥凡三道
數十州百萬旅歸于聖理公之功也朱滔以幽燕勁卒獯
虜驍騎將欲橫行咸洛崛強中原輔其兄泚窺伺神器公

以奇謀正義間說成德成德與滔契重婚姻事同艱阻與
公交鋒對壘積爲敵讐乃爲國爲公忿滔如嚮將欲自竭
先誠於公投我以可疑報之以必信公與王公之相見也
王公旌旆車騎亘如長雲晦日蔽天風驅而至公以數騎
徑造其前王公叱去左右躍鞍而下交臂號譟聲聞昊天
卽日兩軍億萬之師悉如兄弟公遂入其壘授之以畫明
日合勢大破滔軍于涇城之西滔鼠竄舊巢至死不振逆
泚折臂羣寇奪魄諸將聞風益壯踵武獻功旣而妖彗滅
星躔復鯨鯢戮海水清而振曜靈威興復昌運自我而始

其天啟與公使將如臂使卒如指決勝于千里之外者則
河中拔淮夷殄分彼成功什三四焉初臨洛之解遷工部
尚書洹水之勝轉兵部魏橋之勤加右僕射漳濱之固轉
左僕射同中書門下平章事朱滔之敗遷司空食實封五
百戶貞元初上有事于上帝列祖公得請會朝宣室受釐
明堂布政對揚丕顯錫命蕃庶方寄股肱而藩屏是切方
屬周召而桓文是賴數月受命還鎮公之鎮於潞也垂三
十年撫五郡四封之人作之醫作之師生成之富庶之耆
老詣闕願刊金石詔俾時宰揚其頌聲廼者大梁東平二

帥交惡僉使上介質正於公公以天道助順神明與直裁而辨之司徒王公以不二心合公一德資稟明略有如元龜議者謂上黨之俗地狹尚力氣寒堅冰蓋戰國武卒之餘也故長於步冀之北土馬之所生故長於騎而公與王公天下之傑也各因其俗之所長以伯諸侯嗚呼使公將步王公將騎以征四方以獎王室亂臣賊子誰敢萌心上天爲何而降公疾願守謙損固辭崇高請罷三公拜章七還天子重違宗臣之請又迫蒼生之望退授僕射而安危注意之任猶以煩之十年六月一日薨于位春秋六十有

二皇上震悼輟朝三日所以贈襚之品禮極數殫中貴護喪達于洛泗冬十月九日塋於澠池祔先君太保之塋禮也公自生勲門幼被儒術長覽太史公班孟堅書服從衡之言至於兵法尤其天性而體乾之剛利坤之貞煦春之仁厲秋之義蹈禮之節包樂之和是以文昭扶翊武著戡清行備九德政成百度忠與勲偕業與時併兵符相印與身終始開國傳家與國無窮盛矣哉公再娶于鄭華宗令德其偶如一前夫人滎陽郡夫人皇洛陽令伋之子也不幸早世後夫人沂國夫人皇洛州壺關令鞏之子也昔以

賢輔貴今以哀報榮既大公門且肥公室初公之棄三軍也嗣子前殿中侍御史緘爲墮淚所迫俾嗣公位緘曰爲先人之嗣者苟生非忠冒死非孝深惟自免之計旣而忠孝全焉次子幼成季子幼清次女適清河崔宏雅有幹父裕母之美長女幼女並從西方之教各得其旨緘等以公成功盛德列于史策流于歌頌傳于故老之口巍巍乎其不朽矣若邱壑遷化歲序超忽則貞石是賴不可以不識焉爰假菲詞俾鋪元壤銘曰

陰陽成歲百物以生聖賢撫運天下以平神武嗣統朝陽

啟明照臨萬邦震曜不庭蠢彼昏迷乃命徂征風行王化
雷動天聲靡守不固何攻不傾狺狺豺武率馴忠真茫茫
氛祲於變廓清入覲于王惟周之楨帝念藩翰復我長城
宜錫難老以主夏盟奈何昊穹天祿壯齡善積存沒報窮
哀榮勒勲王府遺業生靈歸我真宅封山表塋永閉泉戶
與天壤并

福建觀察使鄭公墓誌銘

唐貞元八年四月十六日福建團練觀察使福州刺史兼
御史大夫鄭公薨于位明年孟夏己酉朔歸塋于東都萬

安山之南原龜吉筮吉卽于人謀且曰前望先君俾公之
體魄列侍于後與茲山久還顧洛邑俾爾子孫盈如市朝
生拜於前沒會於斯公諱叔則字某滎陽人自元魏中書
令周小司空金鄉文公穆凡五葉至皇朝遂州刺史老萊
代以婚姻德義俱爲家法相授公則遂州之冢子也未冠
以明經擢第凡五命至御史府又再遷歷尚書省以屯田
員外郎介吏部侍郎李卿觀風之命議者躉之李公出納
稱職且多貢巖藪幽滯充于王庭繫公是賴轉庫部相國
王縉受居東之寄又資公以畫拜檢校吏部員外郎使罷

而真凡吏部分天下之疑析無文之中曰廢置清九流之路坦多士之門曰南曹公酌其會通守以貞固七考二職日新厥聞丁繼母艱免服拜刑部郎中皇上卽位思與四方萬姓垂家至而日見之制臨遣八使必朝之良公爲首冠清選分命于西江閩越之地所至蠲疾所去遺利並命者取而法焉兩河不開命帥梁汴所求卻穀之比爲其中軍授檢校秘書少監兼御史中丞充天平軍節度副使之官拜御史中丞廉問東夏俄領東都留守兼河南尹就加戶部侍郎仍再位副相之寵持憲以清明律下牧人以禮

讓和俗保釐以威重懷遠寇不敢犯吏不忍欺扶危以安
制動以靜罷鎮歸省轉尚書左丞未幾兼御史大夫撫淮
夷反側之俗四牡蒞止萬人革心如風之清如雨之滌復
命遷太常卿國有大事主辦多儀加銀青光祿大夫轉京
兆尹理行三載惟遭權臣構愆貶永州長史謫去之日京
師鄺空巷隘車不得前怨咨之聲雷動天聽旋以非罪拜
信州刺史居數月又有四嶽十二牧之換方以和風清德
移蠻貊之風何斯人之幸與上天之佑較彼炎瘴而不勝
焉夫人范陽盧氏著作郎侑之女也望申北州德成公家

不幸早世事具前誌生一子曰約河南府洛陽縣主簿後夫人范陽郡夫人盧氏華宗美行與前人如一加繁祉餘慶續公之榮生二男一女納前宏文生紳右千牛衛備身女未笄是日約奉范陽夫人命舉前夫人柩會公之喪禮也公之爲德也溫純深潤高厚博達文以禮樂本於中和犯不違仁愠不傷善滔然如川澤無不容之者及其秉操厲俗好是正直不畏非畏不疑可疑酷惡春秋之左巫疾陰陽之拘忌嶷然如斷山絕嶽不可以邪徑造乎嗚呼使公之得志也天下之人非法言不言非大道不蹈此可以

爲天子大臣未絕遑數其餘哉是以壽七十有一歷官二十有八政朝仰故事人懷遺德門列朱戟家垂清風而遊公藩者猶以不期頤爲歎問神明焉約等以爲哀報揚名莫如紀述謂員昔備吏末嘗司斯文將期飾終何敢廢職銘曰

嗟哉公居此室猗夫人會琴瑟萬安南山瑞氣浮洛陽北闕家聲流匱千祀今日悠悠

陝虢觀察使盧公墓誌銘

唐貞元四年夏六月陝虢都防禦觀察轉運等使陝州刺

史兼御史中丞范陽盧公壽六十中疾於位優詔得謝家東都履信里秋七月甲戌終於其寢冬十月乙酉歸於此堂禮也萬安之腹因山而封嵩邱伊流環帶捧抱龜筮叶吉神宅是宜府君諱嶽字周翰其先齊太公之後公子高奚食采於盧因以命氏乃自東漢中郎植及元魏秘書監陽烏第四子都官尚書道虔凡十葉代代得祿其兄子思道所著家譜詳之道虔生齊左庶子昌衛昌衛生隋澤州內部長寶素寶素生皇朝綿州長史安壽安壽生汝州司馬正紀正紀生絳州聞喜令抗惟是婚姻其類爲義方相

襲禮樂冠蓋俾其盛焉府君聞喜之第二子也發地之祥
鍾天之和處爲孝而友悌從之出爲忠而貞諒從之施於
事物爲聰明純粹而寵位從之天寶末擢明經調宋州襄
邑主簿歷婺州夔州二錄事參軍以大理評事兼監察御
史始佐湖南觀察之政前帥韋之晉倚之以清後帥辛京
杲藉之以立旣真拜又稍遷殿中侍御史京杲入覲咨以
留府時有驕將數人京杲實父子兄弟之其蹈罪姦令率
以爲順府君告之以刑辟明之以無赦而羣帥如故乃盡
戮之由是軍政理而庶政舉初朝廷之任京杲也以恩舊

用不責之以龔黃之績至是還之不可易之不能留之京
師以盡府君之美若是者五載累錫銀印朱紱金章紫綬
加侍御史建中初今上嗣位有自屬部謫官入爲相者謂
公才膺方鎮授容管經略招討等使未一年黜陟使奏課
爲五嶺之表轉桂府觀察經略等使就加御史中丞南越
獷俗井稅之入鮮具其布帛之幅通流之貨悉異中土府
君以美利利之王制制之又每歲有西原之警府君布政
羣盜爲人元年季春賦入貞元三年來朝拜少府監上以
陝郊之守藩垣二京冠冕諸夏非沃心之臣勿授前此元

臣授之是爲郡伯

原註今相國中書侍郎李公自陝徵拜

思嗣其事重難其

選府君於是乎有由衷之拜惟事小不敢不戒大不敢不懲日嚴祇恪惟新厥舊由是軍服其嚴明而報之以肅吏從其簡易而報之以理惜乎其自下車及遘癘不十月焉嗚呼有其才無其時之歎不甚於有其時而無其命今之方鎮蓋唐虞四嶽十二牧之職而周漢股肱爪牙之任府君承堯之咨庸舜之兪累分共理之憂方咨薄伐之效凌風拂翼徘徊于冥冥之間何天奪上心而命孤人望是可爲歎歟府君前娶隴西李氏實姬姜之偶先春早落今

也力不及遠未遑合祔繼室以同宗同德而年位異之三子載戢戢長齒未童幼哀及禮洎兄子嘉猶稟伯父永州司馬嶠之命泣血襄事見託於銘詞曰

世重五姓冠于百族倬彼山川來宗嶽瀆帝慈烝黎命分司牧慎選良臣俾之戢穀猗歟府君受天之祿未見其止如何不淑邱隴何所郊原重複瑞氣嘉祥於是乎育前川爲陵北地爲谷世系德代於是乎獨

刑部郎中李府君墓誌銘

有唐趙郡李府君春秋四十有三歷官十有二政以尚書

郎柱下史分王命於江淮上元元年秋八月十三日遘疾
終揚州官舍之次夫人范陽盧氏先府君三年而少六歲
至德二年九月乙亥捐于吳興郡長史之館屬以國難家
窶靡遑還塋乃各於次而卜宅焉然其引也蓋殯貞元三
年嗣子騰世先人之文行仕殿中侍御史惟周公合祔之
事得請于龜冬十有一月奉府君夫人之喪至自吳楚粵
明月五日遷窆于某原禮也府君諱解字堅水京源宗派
冠蓋功伐史氏志其大家牒詳其細曾祖行敷皇朝曹州
離狐縣主簿祖懷一左千牛并州晉陽縣尉父雍問號州

湖城縣令代有令聞而無違德府君生而博厚長而敏達
超特簡屬中和直清著書屬詞居處執事非中道不蹈非
聖言不聞天寶中擢進士調太子校書當時海內無事縉
紳之徒以能賦爲賢及門爲貴其望登朝也如天之不可
階而升而言語侍從主文典憲之列充其選者必第一流
府君以通事舍人轉左補闕監察御史元宗季年逆帥兆
亂亂成於寵上莫得聞府君奉使朔陲復而露奏其後以
直道不可得而親疎爲誅其不附已者所中配流盧溪郡
至德歲起家宰江陰歷佐晉陵吳興丹陽三郡或參將府

張公鎬軍事其佐郡也廉使輒移真守以避府君大率以古良二千石之理爲之其佐戎也王師賴焉明年克復二京博求多士徵拜金部員外郎稍遷刑部郎中言達於上而惠及于下者非一上元中帝念宗室大臣總東南節制時危任重咨忠賢以貳之詔加府君御史賜銀印朱紱輟爲其介府君方勤王侯伯之事啟其所奉道之將行也末如命何夫人皇朝刑部郎中瀛汝二州刺史宏懌之孫吏部員外郎汝州刺史僕之子年若干歸於府君孝友禮樂得之性命越自齟齬聞于家人率是道也移於夫族而夫

族之長幼內外受其厚者報亦如之惟府君才中公卿而位止下大夫爵宜難老而年夭強仕夫人憑善之積作賢之合天與之偶命與之違命也雙劍相從萬里同穴始者鳳凰之兆豈吉凶類乎員辱命長僚託志卒塋而已銘曰仁壽才貴天之所大如何李公不卿不艾宛宛內子福孤具美德豐椒蘭年天桃李似續惟賢永懷奉先成周還塋於萬斯年

河南少尹裴公墓誌銘

唐貞元八年冬十月二十有八日前河南少尹裴公諱濟

字莊時春秋五十卒于京師靖安里之旅舍明年夏四月
朔塋於絳州聞喜縣之故原從先公居禮也高祖懷節皇
朝洛州刺史生太府少卿昭昭生蔡州刺史剛剛生扶風
郡雍縣令據公則雍縣府君之長子也生而穎秀長而博
辯質如瓊枝文如春林尤長記誦之學酷重許與之契耳
目一歷輒在心口意氣相合坐遺形骸天寶末學優藝全
方登俊造之貢俄屬國難家疚崎嶇險難以喪往事居之
孝稱於所至服闋襄陽節度使來瑱表襄州參軍事屬有
勢勝而理負與人爭官者州府畏之公時攝功曹掾守文

與直不爲之撓瑱嘉其所執升之賓介有疑焉輒以咨之
他日瑱自相位獲譴已而伏誅凡百門吏逃難解散公與
陳郡殷亮始冒危於保衛終毀家於塋喪君子難之故司
徒李公勉聆公之節辟以爲屬自江西入尹京兆洎節制
廣滑汴三府以公明可折獄利可撥繁權可贍給清可澄
察而武可臨戎官厯金吾掾萬年尉三御史二尚書郎以
至於御史中丞職更推官洎度支觀察二判官以至於行
軍司馬公之奉李公也若體從心李公之任公也若素受
采李公制用公爲利器李公翺翔公爲羽翼厥後李公罷

鎮遷河南少尹故孜孜勵精貳前後之政與我同志者必
以吳公李膺之名歸之其有所執賴于周人者非一貞元
五年受代來朝上京燕息衡門詠歌卒歲以俟道長末如
命何初公之在滑也方屬兩河之驚不敢以非疾之憂貽
於高堂堅請退閒亦既終養其在汴也有二千石結根貴
幸怙寵傲慢收小惠於下隳大計於上公數其不供之咎
請以去之言而未行拂衣自免未幾彼果顛覆李公於是
厚禮還公且有中軍中憲之授蓋進退終始不違於道多
此類也母弟澄檢校膳部郎中潤大理司直涇前潁州刺

史少失先府君之教入學入仕爲郎爲邦皆公之訓誘也
夫人隴西縣君李氏故太子賓客翼之子有淑媛之美成
公之家事公姑之孝聞焉奉叔公之友聞焉其輔佐之力
由中及外者出處聞焉今也髻首泣血自雍及絳一號千
里行者悲之子曰鋌弱而有立毀過成人謂員平生交親
見託爲誌其文曰

猗歟裴公昭朗直清哭來發跡和李騰聲處則全養出能
保貞蒸蒸穆穆爲子爲孫天閑遐志摧頽壯齡哀哉哲婦
爲代之程

監察御史裴府君墓誌銘

嗚呼有唐君子河東府君之墓公諱某字某先伯益之苗裔分秦封晉史牒詳之元魏河北太守萬虎兄弟三人時稱三虎並仕於魏魏都河洛在天地之中故裴氏始有中眷之號公則萬虎八代孫也會祖某冀州都督府長史祖某溫州樂城縣令父某蔡州司田參軍初命左領軍衛倉曹參軍倅商州刺史李佐戎事遷同官縣丞李侯移鎮桂林統師南服表公爲監察御史介澄察之政至今二府思李公之美繫公是賴使罷閒于洛陽不幸遇疾以貞元六

年秋八月庚申終於立德里之第享年四十有五明年辛卯塋于首陽山之陽龜筮與人三者皆吉有子四人男曰綽曰約長方胤幼能言女子孟少綽季少約母弟佐洪州南昌縣尉充本道廉使從事計之未及河南夫人穆氏秘書監新安公之季女惟是一日二日洎踰月之事實弱妻主之吾聞之生也全其道沒也全其素是之謂君子公性充天醇氣與道冥行本忠恕文以禮樂可不謂全其道乎遘癘彌年待變彌月疾能銷公之體而不能滅公之和命能天公之生而不能汨公之正可不謂全其數乎表之以

君子言之者無愧銘曰

壽不與仁相會貴不與才相期福不與善相報命不與事相隨何四者之乖刺而不并集於斯已矣乎非夫人之爲慟而誰爲

秘書監致仕穆元堂誌

唐貞元十年十一月二十一日公棄養於東都歸義里私第適寢明年四月嗣子贊洎質員賞奉遷靈座祔會王父母于偃師首陽山之北原贊等惟刻石識墓非周孔之訓宋齊以來有之所以藏馨香俟陵谷不可闕也太夫人河

東郡太夫人命曰禮經三月之事所以必誠必信勿之有
悔焉者蓋孝子自盡之謂然則自盡之大莫大於紀述平
素貽簡幽明假詞他人不足以厭自盡之義公諱寧字某
十一代祖崇元魏宜都王其後孝文自代遷洛陽遂爲洛
陽人奕葉王公與魏終五代祖伽皇朝殷州安陽令贈刺
史太常卿高祖宏遠水部員外郎曾祖固禮秘書郎祖思
恭稷州錄事參軍贈光祿少卿考元休相州安陽令贈同
州刺史自宜都至殷州以淳粹之氣相遺自殷州至同州
以清白之風相授傳洪範九疇究天人之際皇王得之不

出戶庭而天下治學者得之爲王者師公則同州君之元
子鍾天元和發地禎祥性得於孝友忠烈生齊于聰明正
直淵深峻極溥博閱厚用先王之禮樂節而文之是以外
富直道中積至行始厲高節終全盛德宣尼稱道之將行
命也將廢命也命也者似繫一人之謂小子則曰公之道
將行時也將廢時也使我公之得志也天下至公立大道
行風教厚人倫正天之未俾當時臻乎此也豈繫公之命
乎蓋天能使公道可奮乎百代而不洽乎當年才可周乎
萬物而不極於所莅天之不全歟時之不全歟天寶中一

命景城郡鹽山尉在官五年凡七宰旁邑三紀郡政二介使臣祿山作亂以郡有煮海之富屬城之乘使其黨曰劉道元以假守之公乃糾合同志首唱大義梟道元以絕祿山而郡佐畏懦多與公駁史思明統眾來寇郡俾公係東光縣拒之思明駭公之才使騎將持書通好公立斬其使以徇于邑且封其書于郡郡佐逾恐且慮思明之見讐也趣公罷攝公嘗佐黜陟使分巡列郡與平原守顏公眞卿陰圖祿山當亂所以禦之之畫至是密遣家僮以手疏詣顏公書無他辭曰夫子爲衛君乎六字而已顏公執書感

泣卽日以軍師之禮致公公之許顏公也以長子屬于母弟曰唯所往苟不絕先人之祀吾無累也旣而從顏公登陴誓衆以必死與之俱生援絕孤城公志愈厲顏公麾下
有非公所制者伺公請沐中夜迫顏公跳比及於河公方
自拔他日顏公詣行在所自訟有立者公之力無成者已
之咎肅宗嗟歎以璽書徵公且謂顏公曰由廷尉評以諫
議大夫待之旣至會顏公以言事忤旨其議遂寢上元乾
元之間累官史府尚書省分王命于河南征鎮之軍僅十
餘帥憑勲怙寵乘國艱危自以不叛爲文靡顧文法公以

至誠格之大順激之清明律之由公徵令者相率如響元帥李光弼將貳於上屢奸於公公守正不遷積與之隙日宣不令之言欲公畏之公自泗抵徐馳驛輒至理折其口義勝其心泄其愠於包藏奪其謀於將發代宗聞焉爲一二宰臣話之至於歎息于時周鄭路塞東南貢賦之入漕漢江轉商山詔擇文武全才以守夏口我于是有專城連率之寄金印紫綬之寵詔書下日百城肅然清風先翔甘雨隨灑荆越吳蜀之富期月傾之俄封長江與淮西對境厥帥董秦多俾腹心爲其津戍拉商旅斷中流畏公明威

拱手如桔舟楫上下如行其家萬里來臻若赴于市部有
酷吏姻連勲臣敢爲貪狠靡所畏忌公糾發贓罪暴之于
朝且以鞭朴懲其侮慢我於是有再黜之咎勲臣故也居
五稔有詔徵入牽復臺省大厯七年淮南旱和州以師旅
後瘡痍深慎選良牧用膺明命視人如子理事如醫居一
閨人忘其傷又一閨人忘其化無何受代代者冒以天寶
季年版籍之額洎卽日所授數上聞是時兵興二十年矣
異日版籍百無一存代宗震驚以爲亡失在我故有泉州
之貶初公屬以徵發之弊抗于刺舉之司旣而代至則不

知代者之指斐然歟將有爲歟贊守闕訟寃三歲聞徹降
而御史卽州訊問則公初年季年戶增數倍使者還報會
今上龍興拜太子右諭德詔曰令子申父之寃憲臣受君
之命楚劍不衝於牛斗秦臺自洗於埃塵其明如此官坊
養德優游卒歲每台輔易位宜以舉直措枉或曰公卿缺
員僉議所屬以中外之望必集于公而前後宰政率以不
附離之見憚故久滯於次公嘗自卜進退以深識爲元龜
且時不我容我不時徇則非吾之進也在於退乎默然
有浩歸之志凡謝病垂滿十旬而時議迫隘公望充塞不

得已而起者朱泚之亂公方杜門請急出無車馬假乘于
故人太子少師韋公倫棄家逃汙出城信宿方審乎所在
而奔焉轉秘書少監右庶子錄奉天興元之勤也大駕還
宮百官復位公曰可以行吾志矣移疾罷免東歸吾土陵
後五年就加秘書監致仕遂公之志也考槃于澗洛之上
卜勝于北山之陽良辰暇日盡四時之賞以仁自富以道
自貴以孝慈爲稼穡以友愛爲壘簞十年春喟然手疏述
麟德中高宗天皇大帝詔問張公藝九代同居故事撰爲
家令賜諸子諸婦人各一通贊等暨諸婦拜泣受賜公曰

吾之理命也是年秋違豫冬棄背壽七十九公伯姊元夫
人與公同稟至性有高世之德公率太夫人所以敬養之
道達於神明公之教育成人者高祖曾祖兄弟洎孤甥姪
與贊等所以威以勸之慈以撫之壹之乎天性之至外姻
僮僕不知所以別焉性嗜讀書無學不綜經窮入室之奧
史精歷代之博非聖人之教道則知而不言每語及三代
損益以逮於國朝典故莫匪成誦聞者退徵於卷則文字
甲子靡差毫釐或爲卿大夫話其世代蓋鄉子范子自言
其祖不之逮也仕四朝更三紀歷官二十五政德義政事

無非殊効且未嘗有如分之報而三黜一免由之善與人
交始不以諂瀆合終不以生死異嘗從王事厯佐權臣入
於朋家之門雖周鄭交惡田竇奪移彼不我疑我不彼貳
嘗宴居誨羣子曰吾聞君子之事親也養志爲大吾之志
也直道而已爾事君事人或枉其道日以三牲五鼎充吾
庖非養也苟繼吾志或承患難則義重於生宜從其重焉
贊等祇荷嚴訓仕於天朝贊以御史中丞質以右補闕皆
以守職不避強禦並罹譴逐員以侍御史佐東都留守不
敢陷所事殺無辜賞以監察御史叫帝闈解兄難迭逢困

卷之二
三
厄公申誠曰先王之道洎爾友朋之議及吾異日之訓爾
無虧焉愛子者教之以義方不聞以諂爾其勉之贊等永
惟古人有欲養不待之痛公高尚不事待養十年而贊等
官薄命奇不自極於不才不孝之分內乏擊鮮之獻外貽
非疾之憂是以上天神明罰以不得自死之苦夫不死之
道有不敢不能贊等伏念爲公之嗣且太夫人在堂是則
不敢負不肖不逮於義劣不能死荒不及文哀舉大端永
閼幽宅

京兆少尹李公墓誌銘

有唐故京兆少尹隴西李府君諱佐字公輔年未充其志
位未半其才君知其賢天不躋其用親待其養命不偕其
榮貞元六年年六十有一三月丁巳終於長安興仁里閨
四月丁未夫人范陽縣君盧氏奉公之喪達於洛汭月日
壬午弟前監察御史俛承公之喪于告成從先公居且曰
理命初公以疾得謝沉痾累載三事羣公僉謂公仁可長
人武可訓戎正可持刑權可調賦其忠肅明敏尤宜尹京
前後執事當趙張三王吳公李膺之選輒遲遲其授以俟
公之起而公未聞然及時賢聞此凶訃嗟歎之聲浹于上

下詔贈同州刺史賻以布帛故事公卿薨位有以震悼于
上心者則及追贈其或加等申之以賄公以貳尹去職禮
優飾終有以見才拔乎萃恩超于時若假之永年以極其
遇詎可涯也嗚呼惜哉五代祖禮成隋禮部尚書絳郡公
祖元恭皇大理少卿知吏部選事父誦高名下位陳州宛
邱縣公十歲而孤居喪有過成人之感太夫人滎陽鄭氏
抑之然後復於禮弱冠擢明經調婺州武義縣尉以清白
苦節聞故相彭城公辟以從事凡三遷至監察御史領江
西之賦又遷申州刺史戎師作亂移公隋州其後僭逆以

公先奉太夫人在外疑焉折簡招公公以自脫之計未售
辭疾者再元克使其徒來刼公語以疾愈自祇赴者與逆
徒偕先是熟與舅氏克鈞期於境上克鈞日涕泣於襄陽
節度使賈公公感而義之爲出敢死之士克鈞亦毀家行
賂以賈勇奇兵如約公以輕騎脫焉表公爲倖者荆南江
西鄂岳三府上以鄂岳請命先至除檢校戶部郎中兼侍
御史充都團練使鑒駕還京公奉章朝奏是時梁汴圯隔
漕運不至逆將跋扈屯于近郊關輔困於兵蝗帑藏索於
錫與上以貢賦之入必由江津擇全才領商於之地以闢

南門於是有刺史防禦中丞之命公心周庶政手集庶物
明於理身勤於理家俾天收其災地盡其利峻嶺重負至
如川流詔加朝議大夫賜金印紫綬封太夫人滎陽太君
賜一子官其事刻之金石實吏部侍郎李公爲之頌無何
授桂管觀察經畧使部內不及朝貢之羈縻州者十八舊
例首領責於官署爲刺史一州所貢悉以奉之其或魚肉
斯人之甚有來訟者率以遐遠阻險非文法所及置之公
於是易之以中土溫良之吏越人之男女不爲所鬻資產
不爲所奪悅而戴之相與稟令其移風俗如此者非一累

以親老陳乞故有亞尹之拜是則假道無如命何初宛邱之人吏感府君之明惠而矜公之孤藐相與竭於贈子所以送死養生之異兼焉太君曰昔吾夫之所以爲生也今以沒而受賄則是死吾夫也畢以辭之公由是奉先公之貽訓太君之清德常恐失墜三爲郡一爲帥從公者二十六年退居無具藥之資沒代無護終之直室有孀姊妹挈孤甥者數房孀與孤者亡無怙之恤一女熒然俛以其弟二子彥主公之後焉嗚呼爲富不仁爲仁不富信矣積善餘慶何其不信哉不然公之所豐者仁義所不絕者遺愛

故事風流於後豈物莫兩大而使然耶俛以員兄弟偏公之遇辱命爲誌悲而不文銘曰

君之生葉成官達尊親揚名天錫純孝古之遺清君之沒背高堂去白日恨榮養之不終吐遺言於將絕祔君於先嗣君於後賢哉悌弟之心有以復君之友

國子司業嚴公墓誌銘

公諱某字某馮翊臨晉人其先有漢太子太傅彭祖爲左馮翊子孫家焉十二代祖翰林東漢末復守本郡後四葉至元魏平南將軍卻陽侯稚玉又四葉至皇朝洮州都督

中侍御史虞部員外郎河洛思其理理行發聞拜河南令
刑部郎中雅素儒學選國子司業建中宰政怙威朋家構
閔公以親累貶潮州司戶時泰道長公議與能推連州刺
史換彬州累加朝議大夫封馮翊縣男旌異政也公母弟
士良並龔黃之寄蓋不勝形影分離之憂及聞士良罷歸
公亦陳乞自免願言相視而終老焉旣至京師復拜國子
司業無何士良出牧公悼別加等忽忽不樂燕居如失貞
元八年某月某日歸全于長安新昌里之私第春秋六十
有五初公自彬之歸也有從祖姑世父母身沒嗣絕旅殯

越公鄉匍匐發護毀家襄事各遷祔于先塋服仁義者歸
心焉夫人彭城劉氏右僕射彭城公之女生子男三人先
公而沒祔先姑于龍門山之北原事具前誌嗣子纂次子
筠季子篆皆感過于縗毀疑于滅冬十一月二十有一日
奉公歸夫人之室且從先君銘曰

嚴氏阡北原上先賢後賢如相望我歸曷歸歸我室我友
俟我以琴瑟杳長夜兮無白日

驃騎大將軍劉公墓誌銘

公諱海賓彭城人也祖滔皇朝散大夫徐州別駕父元銀

青光祿大夫澤州刺史公以義俠聞于汧隴之間洎天下
兵興以身許國累功百戰全生萬死厯官十七政至於開
府儀同三司御史中丞樂平郡王食實封五千戶充涇原
節度兵馬使建中初逆將劉文喜竊涇州叛皇上以神武
肅毅齊一四海欲使亂臣賊子作誠于涇六月興戎羣帥
奔命前事之日公挈長子光國度文喜將叛而不支也始
以奏請造于帝庭敷露姦慝陳獻忠款期以父子爲其膏
肅上撫而還之嗚呼天地啟公之謀果有雷電之誅假于
光國之手梟磔文喜獻其元于蠻夷之邸城池師旅與功

全焉天子御正殿朝百辟引公父子同日封拜公拜驃騎
大將軍左驍衛大將軍依前兼御史中丞又賜實封一百
五十戶封光國五原郡王是時軒陛之下龍驤虎賁之士
相賀且勸不旬時而名布天下宿衛中禁爲王爪牙後二
年長安有朱泚之亂公與故太尉段秀實約曰公爲曹沫
我爲荊卿期以一劍而復大駕故公先機而發有害其成
段公與公是日并命君子謂二公之歿千古如生時建中
四年十月十日享年六十有二明年鑾輅還宮於公有未
及下車之詔追贈太子太保又賜實封五百戶所以賙禔

之品禮極數殫而宸衷羣望猶未之塞先是淮夷叛命光
國東征厥後王事龜筮差池未協蓋不遑五月同盟之會
者七年于茲矣貞元七年六月四日夫人鴈門郡太夫人
田氏壽若干棄養于東都安國光國銜恤卜兆得北邙山
之南原西遠國門三十許里乃以日月有時之事請于居
守吏部尚書杜公公列狀以聞而飾終之典如初禮十月
乙卯太保公之喪至自京師十月己巳啟太夫人之殯壬
申遷而合祔焉夫人承夫以禮訓子以義享其豐報鍾慶
於身然而太保有命代之勲寵位未半光國有日躋之孝

色養遽違各從其策不極其分悲夫光國以太子詹事兼御史中丞襲樂平郡王充東都防禦左廂兵馬使次子某試太常卿清國太子通事舍人潤國未仕皆大夫之特也光國繼忠襲貴終以哀報願奉不朽銘之墓門其詞曰

赫赫太保自天降忠見危致命有始有終佐戎于涇涇帥不龔父心子手震路元克皇家中否大盜邁逆偉哉段公與我同德將滅妖彗載清宸極天之方稔運奪其力悠悠青史異代悽惻抑抑夫人率禮無違夫忠子孝寵祿由之九原何許雙劍同歸鼓吹晨發霜清風咽生榮死哀加等

備物于嗟後人無忘忠烈